

दिनांक 30.04.2025

समय: 18.45 बजे

आकाशवाणी जयपुर-अजमेर ऊं पेश है

प्रादेशिक समाचार

- केन्द्र सरकार आगली जनगणना मांय जाति गणना ने ई शामिल करण रो फैसलो कीनो-कैबिनेट री मीटिंग मांय केई खास फैसला करी ज्या।
- व मुख्यमंत्री भजन लाल शर्मा राज्य मांय विकास अर निवेश रा मौकां रा बारा मांय एशियाई विकास बैंक रा अहलकारां सागे चर्चा कीनी।
- व विधानसभा मांय नुवी व्यवस्था रा तहत सत्र पूरो व्हां पाछे ई विधायकां ने सवाल पूछण रो मौको मिलेला।
- व देश रो पहलो वर्ल्ड ऑडियो विजुअल अर एन्टरटेनमेंट सम्मेलन-वेब्स काल मुम्बई मांय सरू व्हेला-प्रधानमंत्री नरेन्द्र मोदी रो इण रो उद्घाटन करण रो कार्यक्रम।

000

केन्द्र सरकार आगली जनगणना मांय जाति गणना ने शामिल करण रो फैसलो कीनो है। प्रधानमंत्री नरेन्द्र मोदी री सदारत मांय मंत्रिमण्डल री राजनीतिक कार्य समिति री मीटिंग मांय ओ फैसलो करी ज्यो। केन्द्रीय मंत्री अश्विनी वैष्णव आज नई दिल्ली मांय खबरनवीसां सागे बातचीत करता थकां आ जाणकारी दीनी। वे बतायो के जनगणना केन्द्र रो मुद्दो है। श्री वैष्णव कह्यो के कुछ राज्य जाति सर्वेक्षण सियासी कारणां ऊं कीनो।

.....

केन्द्रीय मंत्री वैष्णव बतायो के सरकार गन्ना किसानां सारू चीनी मौसम 2025-26 मांय गन्ना रो उचित लाभकारी मूल्य 355 रुपया प्रति क्विंटल तय कीनो है। वे कह्यो के इण ऊं गन्ना री उपज लेवण वाळा पांच करोड़ किसानां सागे शक्कर बणावण वाळी मिलां अर इण ऊं जुड़्या कामां मांय लाग्योडा पांच लाख मजूरों ने ई फायदो मिलेला। मीटिंग मांय मेघालय री राजधानी शिलांग ऊं आसाम रा सिल्चर बीचे करीब 166 किलोमीटर लम्बा ग्रीन फील्ड कॉरिडोर रा विकास ने ई मंजूरी दीरीजी।

000

एशियाई विकास बैंक रा अहलकार आज मुख्यमंत्री भजन लाल शर्मा सागे जयपुर मांय मुलाकात कीनी। एक सोशल मीडिया पोस्ट मांय श्री शर्मा मांड्यो के ए.डी.बी री कन्ट्री डायरेक्टर मियो ओका अर दूजा अहलकारां सागे व्ही मीटिंग मांय राज्य मांय विकास रा कामां, निवेश रा संभावित मौकां अर मदद रा बारा मांय विगतवार चर्चा करी ज्यी।

000

मुख्यमंत्री भजन लाल शर्मा री सदारत मांय सहकारिता वर्ष रा कार्यक्रमों सारू राज्य स्तर री समिति बणायी ज्यी है। आ समिति अन्तर्राष्ट्रीय सहकारिता वर्ष 2025 रे दौरान व्हेवण वाळा कार्यक्रम करावेला। कृषि, उद्यानिकी अर ग्रामीण विकास, पंचायतीराज, सार्वजनिक वितरण अर उपभोक्ता मामलात, पशु पालन अर डेयरी, सहकारिता अर नगरीय विकास अर स्वायत्त शासन विभाग रा मंत्री ई समिति रा सदस्य बणायी ज्यी है।

000

सिक्किम रा राज्यपाल ओम प्रकाश माथुर आज जयपुर मांय राज्यपाल हरिभाऊ बागडे सागे मुलाकात कीनी। राजभवन मांय व्ही ई शिष्टाचार भेंट रे दौरान दोन्यू राज्यपाल न्यारा-न्यारा मुद्दां माथे चर्चा कीनी। राज्यपाल श्री बागडे रो काल प्रतापगढ़ रो दौरा करण रो कार्यक्रम है। वे ई दौरान अहलकारां सागे मीटिंग कर र ज़िला मांय कर्या जा रह्या विकास रा कामां रो जायजों लेवेला।

000

राज्य री 16वीं विधानसभा रो तीजो अधिवेशन सोमवार ने खत्म व्हेवण रो ऐलाण कर दियो ज्यो। विधानसभा अध्यक्ष वासुदेव देवनानी कह्यो के ई पाछे ई विधायकां ने नुवा सिरा ऊं सवाल पूछण रो मौको मिलेला। वे कह्यो के अब हर विधायक सप्ताह मांय एक अंतःसत्रकालीन अतारांकित सवाल पूछ सके है। ऐड़ा हर सवाल रो जवाब राज्य सरकार ने 30 दिन री मियाद मांय सीधो संबंधित सदस्य ने भेजणो जरूरी व्हेला। ई सागे ई जवाब री एक प्रति विधानसभा ने ई भेजणी व्हेला। श्री देवनानी बतायो के ई व्यवस्था ऊं जनता रा काम रा मुद्दां माथे विधायक जाणकारी हासिल कर सकेला। वे कह्यो के लोकतंत्र मांय जनता री समस्यावां रा निपटारा मांय इण ऊं घणी मदद मिले है। विधानसभा स्पीकर कह्यो के नुवा सत्र मांय विधायक ओजू सवाल पूछ सकेला। स्पीकर कह्यो के नुवा सत्र मांय हर विधायक तैय 10 तारांकित अर 20 अतारांकित सवाल पूछ सकेला।

000

जोधपुर री मण्डोर कृषि उपज मण्डी रा एक मकान ऊं पुलिस नकली नोट छापण रो कारखानो पकड़्यो है। कार्रवाई रे दौरान दो जणां ने गिरफ्तार कर र वां रा कब्जा ऊं साढे सात लाख रुपया मोल रा नकली नोट बरामद करी ज्यो। मौका ऊं नोट छापण सारू काम ली जावण वाळी मशीन, रंगीन छपाई करण वाळी मशीन अर रसायन ई जब्त करी ज्यो। डूंगरपुर जिला रा बिछीवाड़ा हलका मांय गैर कानूनी तौर ऊं डोडा चूरो ले जाता थकां एक जणा ने पुलिस गिरफ्तार कर लीनो। आरोपित ट्रेक्टर-ट्रॉली मांय भरी ईटां बीचे करीब 430 किलोग्राम डोडा चूरो ले जा रह्यो हो।

000

झालावाड़ जिला रा अकलेरा हलका मांय पिरवार वाळां सागे एक ब्याह मांय आयी नाबालिग टाबरी सागे सामूहिक यौन दुराचार रो मामलो सामी आयो है। एस.पी. ऋचा तोमर बतायो के पुलिस सगळा 9 आरोपितां ने पकड़ लीना है अर मामला री जांच करी जा रही है।

000

आखा तीज आज परम्परागत आस्था सागे मनायी जा रही है। अबूझ सावो मान्यो जावण रे कारण ई मौके मोटी तादाद मांय ब्याह रा जळसा अर मांगलिक आयोजन कर्या जा रह्या है। लोकसभा अध्यक्ष ओम बिरला ई आज झालावाड़ मांय राख्यी ज्यो भेळा ब्याह मांय शिरकत कीनी। कार्यक्रम मांय वे कह्यो के समाज मांय बदलाव सारू ऐड़ा आयोजन खास है।

.....

आखा तीज रे मौके किसान अनाज अर खेती-बाड़ी मांय काम आवण वाळा साज-ओ-सामान री पूजा कीनी। ई मौके गांवां मांय बाजरा अर गुड़ रा परम्परागत व्यंजन ई बनायी ज्यो। परशुराम जयंती रा सिलसिला मांय झालावाड़ समेत केई ठौड़ां शोभायात्रा निकाळी ज्यी अर धार्मिक आयोजन राख्या जा रह्या है। शेखावाटी हलको बसावण वाळा महाराव शेखाजी रो 537वों निर्वाण दिवस आज जयपुर मांय सर्व-धर्म-समभाव रा तौर ऊं मणायी ज्यो। ई मौके न्यारा-न्यारा धर्म गुरु सहिष्णुता अर भाईचारो बणायो राखण बाबत् कह्यो।

000

देश री पहली वर्ल्ड ऑडियो विजुअल एण्ड एंटरटेनमेंट समिट-वेक्स 2025 काल सुरू व्हेला। मुंबई मांय व्हेवण वाळा चार दिन रा ई सम्मेलन ऊं श्रव्य-दृश्य अर मनोरंजन उद्योग सारू वैश्विक मंच मिल सकेला। पेश है एक रपट-

.....

000

राज्य रा आतूणी हलका मांय घणखर ठौड़ां दिन री बगत तापमान 43 ऊं 46 डिग्री सेल्सियस बीचे नाप्यो जा रह्यो है। प्रदेश रा ऊगणी हलका मांय ई पारो 40 ऊं 45 डिग्री सेल्सियस बीचे दर्ज कर्यो जा रह्यो है। मौसम विभाग रे मुजब आज बाड़मेर, जैसलमेर अर जोधपुर जिलां मांय लू रो असर रह्यो। लारला चौबीस घंटां मांय जैसलमेर मांय अधिकतम तापमान 46 दशमलव 3 डिग्री सेल्सियस रह्यो। बाड़मेर अर जैसलमेर जिला मांय काल ई कटे-कटे लू बाजण रा आसार है। काल दोपहरां पाछे जोधपुर, बीकानेर, अजमेर, जयपुर, कोटा अर भरतपुर संभाग रा कुछ हलका मांय गरज सागे हल्की बारिश री संभावना है। ई दौरान जोरदार बायरो बाजण रा ई आसार है।

000

प्रदेश ऊं हज रा मुकददस सफ़र माथे जावण रो सिलसिलो काल सुरू व्हेला। ई साल राज्य ऊं 3 हजार 408 जणां हज करण सारू जावेला। हज यात्रा बाबत् जयपुर रा सांगानेर हवाई अड्डा ऊं 8 मई ताई 17 उड़ानां सउदी अरब रा मदीना जावेला। काल सिंज्यां रवाना व्हेवण वाळी पहली उड़ान मांय 164 यात्री जावेला। ई सारू हज कमेटी री ओर ऊं लम्बा बगत ऊं तैयारियां करी जा रही ही। ई दौरान मुसाफिरां ने सिखावण दीरीजी अर जरूरी टीका लगायी ज्या। जयपुर रा हज हाउस मांय मुसाफिरां रा सुबीता सारू रकम बदलावण रो काउंटर ई लगायी ज्यो है। हज कमेटी ऑफ इण्डिया हज सारू जावण वाळा सगळा यात्रियां ने हज सुविधा एप 2.0 डाउनलोड करण री राय दीनी है।

000

काउन्सिल फोर दी इंडियन स्कूल सर्टिफिकेट एग्जामिनेशन आईएससीई री दसवीं अर आईएससी री बारहवीं कक्षा रा इम्तिहान रा नतीजा रो ऐलाण कर दीनो है। करीब अढ़ाई लाख विद्यार्थी दसवीं री अर 99 हजार ऊं बत्ता विद्यार्थी बारहवीं री परीक्षा दीनी ही। दोन्यू इम्तिहान मांय टाबरियां रा नतीजा टाबरा रे मुकाबले बेहतर रह्यो।

000